

## 開放文學 – 神鬼仙俠 – 天妃娘娘傳 第三十一回 天妃媽收服鱷精

[以上缺] 始快而無憾。不然，誓不空還。乃先差一卒，齎文書一角，直至東海龍宮，見了龍王，約次日外各治兵於東洋相會。

小卒領命去訖，妃乃將盒化作二缸，一自載，一載護法諸軍，竟向東洋而去。至下午，出於半洋，忽見群魚無千巨萬，各自逃生不已。未幾，那鱷隨後，盡力追趕群魚而食之。妃曰：「此妖又在於此，魚蝦受其殃者，有不可勝數矣，正所謂為善者一念不忍，則念念皆不忍；為惡者一事才忍，則事事皆才忍。」那妖精未知是妃之來，追魚至近乃見，遂深沉海底，望東北盡力而逃。妃亦盡力而趕，趕上數十里不及。妃謂眾將曰：「四海如彼其大矣，水如彼其深矣，吾攻其南，彼逃於北；吾攻其東，彼逃於西。如此而盡心力而為之，終無功之可成。吾昨日已移文東海龍王，今日此洋中相會。須俟龍王之來，乃率其魚蝦蠃蟹之眾將，四邊圍繞，然後一舉號令，四面響應。龍王攻其前，則吾攻其後；龍王攻其左，則吾攻其右。東西南北，路無可逃；上天下地，勢不能脫。當此時雖一身百臂，無所展其力，壹頭千口，不得肆其毒，此一勞永逸，萬全之策也。」乃聚兵不動。

那龍王得天妃檄文，大會群臣，相議曰：「那鱷之為東海害也有年矣，驅之而不去，殲之而不能。民物為之雕耗，雞犬為之不寧。正未得乘其機而除之。今有湄灣天妃，欲濟世救民，力除此妖，明日約會兵於東洋，正可乘此機而滅之，庶海中寧謐，水族無災。」乃盡點部下甲兵，令左右中前後五營大將統領諸兵，自隨其後，直至東洋，與天妃相會。次早晨時發兵，須臾即到東洋，見天妃兵將已到，團聚於此。龍王遙望天妃，欠身施禮曰：「遠勞聖駕到此甚矣，此妖之為害也。不得遠迎，而治兵反後，不恭之罪，不可道矣，實望恕之。」妃曰：「妖之為害，不獨今日始然，吾除妖之志，不獨今日始切。但以東洋廣闊，妖力甚強，吾欲除之，彼盡力逃遁有所照顧不及處，遂使彼得以幸脫。所以欲會大眾，盡東海而圍之，然後到一處，守一處，過一隅，封一隅，彼但有前奔，而不得復入，東西南北之逃既窮，而吾之追兵不已，彼雖欲高飛深入，蓋有不可得矣。則此舉妖可滅也。」龍王曰：「天妃之謀，人所不及，敢不唯命是從。」即令四營水兵，各布四方，臨期聽令施行。龍王乃自帶中軍諸兵，隨妃大眾之後，以聽提調。

分撥已定，妃乃令人眾倍道東趨而進，不上數里，遇著妖鱷而追之。鱷見勢大，不戰而走，東西南北四將領水兵俱出，鱷勢窮力屈，捨命撞東而走，關門牢固，劍戟如霜，千衝萬突，並不得入。正在危迫之際，天妃乃以盒化作二扇大石門，立於水底，其中似有洞形。鱷被迫急，見一石岩，遂將身伏於其中。被天妃念了真言，兩石遂合，將鱷收在其中，收於團盒。天妃誦數遍縛魔咒，將鱷捆縛，付龍王帶往東海，幽囚於小壑之中，用符咒鎖押其上，萬年不得復出，以受飢餓之苦。鱷既收平，海內寧靜，龍王自回龍宮，天妃班師回湄洲，大設太平宴，犒賞諸將。